


LES COMBATS DE COQS

Prix: 20 Centimes



*Je
Decottignies
971 (2nd)*

Lith. Bolduc Freres, Lille, r. Solférino, 7

CHANSON LILLOISE par CH. DECOTTIGNIES.

LES COMBATS D' COQS

AIR : *Jeannie, Jeannette et Jeanneton.*

Lorsque l' Dimanch', vêtu brav' mint ,
Lorgnon su l'œil, cigare in bouque ,
Vous pourchassez quèqu' amus' mint ,
Pus difficile à prind' qu'eun' mouque.
Au bout d'un bras bien rétindu ,
Presqu'aussi raid' qu'un membre in chire ,
Si vous voyé' un sa pindu ,
Suivez-le, et vous pourrez dire :

REFRAIN :

L' vrai plaisi , ch'est un combat d' co. } *Bis.*
Cocorico !... Cocorico !... (1)

Suivez , tant que l' porteu march'ra ,
Ch' grand sa , qu'eun' pau' biète accompagne ;
L'un portant l'aut' , cha vous mèn'ra
Dins l' cour d'un cabaret d' campagne.
Armés d'*ép'rons* , comme un n'hussard ,
Là d'dins , deux cos s' fich'nt eun' tatoule ;
Mais par malheur vous ête' in r'tard ;
On crie : Bravo !... Ch'est l' sang qui coule !

L' vrai plaisi , ch'est un combat d' co. } *Bis.*
Cocorico !... Cocorico !...

(1) Imiter le chant du Coq.

L' *vainqueur* ramasse l' picailon
Qu'il a bien gaingné dins l' bataille ;
L' *vaincu*, destiné au bouillon,
Est accroché conte eun' muralle.
L' bièr' comme l' sang coul'nt tout partout ;
Mais n' peurnez point d' billet d' sortie,
Car du spectacle ch' n'est point tout ;
On va qu' mincher l' deuxièm' partie.

L' vrai plaisi, ch'est un combat d'co. } *Bis.*
Cocorico !... Cocorico !...

Ches *batailleurs*, d'un pus grand prix,
Faitent r'doubler l' *ivress'* de l' foule,
Et dins l' parc, l' argent des paris
S'amass' dins l' poussière ou l' bedoule.
Tous les cœurs batt'nt à l' unisson,
Ch'est pus fort qu'à l' guerr' du Mexique.
Vous n'intindez point l' pus p'tit son
Tant qu'un co n'ait r'chu s' dernièr' trique.

L' vrai plaisi, ch'est un combat d' co. } *Bis.*
Cocorico !... Cocorico !...

L' prologue s' pass' dins l' cabinet,
Où l' *armemint* s' fait par adresse ;
Ch'est aussi là, je l' dis tout net,
Que l' coqu'leu triche avec finesse.
Des cancons je n' sus point l' écho,
Mais j'aime assez d' vous fair' connaître,
Qu' l'un fait boir' de l' bière à sin co,
Et qu' l'aut' met de l' graisse in d' ssous s' crête.

L' vrai plaisi, ch'est un combat d' co. } *Bis.*
Cocorico !... Cocorico !...



Rien n'est sacré pour un... coqu'leu,
Car si dins l' pare sin'co caponne,
Cheull' pauveur biêt' pass'ra au bleu ;
Mèm' dins l' marmite ell' n'est pus bonne.
S'il est vainqueur ! pou ch' l' haute action,
On l' l'apouchenne avec délice ;
Il a tout d' suit' double ration,
Comme un malad' sortant d' l'hospice.

L' vrai plaisi, ch'est un combat d' co. } Bis.
Cocorico !... Cocorico !...

Ah ! ch'est un bien noble amus' mint !
Qu' ches combats d' eos, digu's des sauvaches ;
On les vot s'éborgner bêt' mint,
Et s' percher l' corps comm' des fromaches.
Infin ch'est rare qu' les coqu'leux
Vodrott'nt finir ches glorieus's fiêtes,
Sans s'arracher quèqu's mèch's de ch' feux,
In battillant..... après leus biêtes.

L' vrai plaisi, ch'est un combat d' co. } Bis.
Cocorico !... Cocorico !...



CH. DECOTTIGNIES.